

四庫全書

集部

欽定四庫全書

石倉歷代詩選卷七十三

明 曹學佺 編

中唐二十七

李德裕

字丈鏡  
贊皇人

夏晚有懷平泉林居

孟夏守畏途捨舟在徂暑愀然何處念念我龍門塢密  
竹無蹊徑高松有四五飛泉鳴樹間颯颯如度雨茵桂

秀層嶺芳蓀媚幽渚稚子候我歸衡門獨延佇誰言聖  
與哲曾是不懷土公旦既思周宣尼亦念魯矧余竄炎  
裔日夕誰晤語眷閼悲子牟班荆感椒舉悽悽視環玦  
惻惻步庭蕪豈待莊舄吟方知倦羈旅

早秋龍興寺江亭閒眺憶龍門山居崔張從舊事  
江亭感秋至蘭徑悲露滋秔稻秀晚川杉松鬱晴嶽嗟  
予負林壑茲夕念原衍綠篠連嶺多青莎近溪淺淵明  
菊猶在仲蔚蒿莫剪喬木槩凌苔陰岩積幽蘚遙思伊

川水北度龍門峴蒼翠雙闕間逶迤清灘轉故人在鄉  
國歲晏路悠緬惆悵此生涯無由共登踐

比聞龍門敬善寺有紅桂樹獨秀伊川嘗於山  
南諸山訪之莫致陳侍御知予所好因訪剡  
溪樵客偶得數株移植郊園衆芳色沮乃知  
敬善所有是蜀道茵草徒得嘉名因賦是詩  
兼贈陳侍御

昔聞紅桂枝獨秀龍門側越叟遺數株周人未嘗識平

生愛此樹攀翫無由得君子知我心因之為羽翼豈煩  
嘉客譽且就清陰息來自天姥岑長凝翠嵐色芬芳世  
所絕偃蹇枝漸直瓊葉潤不凋珠英粲如織猶疑翡翠  
宿想待鵲雛食寧止暫淹留終當更封植

清明後憶山中

遙思寒食後野老林下醉月照一山明風吹百花氣飛  
泉與萬籟髣髴疑簫吹不待曙華分已應喧鳥至

題寄商山石

綺皓巖中石嘗經臥隱淪紫芝歌幾曲紅蘚閱千春聊  
用支琴尾寧惟倚病身自知來處所何暇問巖遵

思鄉園老人

嘗羨華門翁所思惟歲稔遙知松月曙尚在山牕寢蘭  
氣入幽簾禽言傍孤枕晨興步巖逕更酌寒泉飲

寄龍門僧

龍門有閒士愛我春潭碧清景出東山閒來翫松石應  
憐林壑主遠作滄溟客為我謝幽僧終當理歸策

張公超谷中石

鼓篋依綠槐橫經起秋霧有時蓮岳客尚辨絃歌處自  
予去幽石誰人襲芳杜空留古苔石對我岩中樹

潭上喜見新月

簪組十年夢園廬今夕情誰憐故鄉月復映碧潭生皓  
彩松上見寒光波際輕還將孤賞意暫寄玉琴聲

潭上紫藤

故鄉春欲盡一歲芳難再巖樹已青葱吾廬日堪愛幽

溪人未去芳草行應礙遙憶紫藤垂繁英照潭黛

雙碧潭

清剌與巖湍潺湲皆可憶適來玩山水無此秋潭色莫  
辨幽蘭叢難分翠禽翼遲遲洲渚步臨眺忘殫食

二猿

釣瀨水連漪富春山合沓松上夜猿鳴谷中清響合衝  
網忽見羈故山從此辭無由碧潭飲爭接綠蘿枝

晨起見雪隱山居



忽憶巖中雪誰人拂薜蘿竹梢低未舉松蓋偃應多山溜隨冰落林膚帶霰過不勞聞鶴語方奏苦寒歌

憶寒梅

寒塘數樹梅常近鴈前開雪映綠巖竹香侵汎水苔遙思清景暮還有野禽來誰是扳枝客茲辰醉始迴

憶茗芽

谷中春日暖漸憶掇茶英欲及清明火能銷醉客醒松花飄鼎泛蘭氣入甌輕飲罷閒無事捫蘿谿上行

憶晚眺

伊川新雨霽原上見春山  
緱嶺秦虹斷龍門宿鳥還  
牛羊平野外桑柘夕煙間  
不及鄉園叟悠悠盡日閒

追和太師顏公同清遠道士遊虎丘寺

茂苑有靈峰嗟余未遊觀  
藏山半平陸壞谷為高岨  
岡繞數仞墻巖潛千丈幹  
乃知造化意回幹資奇玩  
鏐騰昔虎踞劒沒嘗龍渙  
潭黛入海底崙岑聳霄半  
層巒未升日哀猊寧知旦  
綠篠夏凝陰碧林秋不換  
冥搜既窈

窈回望何蕭散川晴嵐氣收江春雜英亂逸人綴青藻  
前哲留篇翰共扣哀玉音皆舒文繡段難追彥回賞徒  
起興公嘆一夕如再升含毫星斗燦

東郡懷王京兆

河水昔將決衝波溢川潯崢嶸金堤下噴薄風雷音投  
馬災未弭為魚嘆方深惟公執珪璧誓與身俱沉誠信  
不虛發神明宜爾臨湍流自此回咫尺焉能侵逮我守  
東郡悽然懷所欽雖非識君面自謂知君心意氣苟相

合神明無古今登城見遺廟日夕空悲吟

懷陽給事

宋氏遠家左豺狼滿中州陽君守滑臺終古垂英猷數  
仞城既毀萬夫心莫留跳身入飛鏃免胄臨霜矛軍命  
在旗下僵尸橫道周義風激河汴壯氣淪山丘嗟爾抱  
忠烈古來誰與儔就烹感漢使握節悲陽秋顏子綴清  
藻鏗然如素璆徘徊望故壘尚想精魂遊

秋日登郡樓望贊皇山感而成詠

昔人懷井邑為有掛冠時顧我飄蓬者長隨泛梗移越吟因病感潘鬢入秋悲北指邯鄲道應無歸去期

秋日美晴郡樓閒眺寄京南張書記

高檻涼風起清川旭景開秋聲向野去爽氣自山來霄外鴻初返簷間燕已歸不因煙雨夕何處夢陽臺

故人寄茶

劍外九華英絨題下玉京開時微月上碾處亂泉聲半夜邀僧至孤吟對竹烹碧流霞脚碎香泛乳花輕六腑

睡仙去數朝詩思清其餘不敢費留伴讀書行

早入中書行公主冊禮事畢登集賢閣成詠

明星入東陌燦燦光層宙皎月映高梧輕風發涼候金  
門列葆吹鐘室傳清漏簡冊自中來貂黃忝宣授更登  
天祿閣極眺終南岫遙羨商山翁聞歌紫芝秀晨興念  
貽辱夕惕思致寇傾奪非我心悽然感田實

南梁行

江城鬱鬱春草長悠悠漢水浮清光雜英飛盡空和景

綠楊陰重官舍靜此時醉客縱橫書公言可薦承明廬  
青天詔下寵光至頌籍金閨徵石渠重歸山路煙嵐隔  
巫山未深晚花折澗底紅光奪目燃搖風有毒愁行客  
杜鵑啼咽花亦殷聲悲絕艷連空山斜陽瞥映淺深樹  
雲雨翻迷崖谷間山雞錦質矜毛羽透竹穿蘿命儔侶  
喬木幽谷上下同雄雌不異飛棲處望秦峰迥過商顏  
浪疊雲堆萬簇山行盡杳冥青嶂外九重鐘漏紫雲間  
元和列侍明光殿諫草初焚市朝變北闕趨臣半鏤塵

南梁笑客皆飛霞追思感嘆却昏迷霜髯愁吟到曉難  
故園歲深開斷簡秋堂月曉掩遺袿嗚嗚曉角霞輝聚  
撫劒當楹一長嘆芻狗無由學聖賢空持感激終昏旦

思歸赤松子村呈松陽子

昔人思避世惟恐不深幽禽慶潛名岳鴟夷漾釣舟顧  
予知止足所志在歸休不似尋山者忘家恣遠遊

近臘對雪有懷林宮

蓬門常晝掩竹逕寂無人鳥起飄松霰麝行動谷榛應



狎禽魚侶長與薜蘿親  
遙憶平臯望溪煙已發春

初夏有懷山居

山中有所憶夏景始清幽  
野竹陰無日巖泉冷似秋  
翠岑當累謝皓月入輕舟  
只有思歸夕空簾且夢游

山居遇雪喜道者相訪

幽居近谷西喬木與山齊  
野竹連池合巖松映雪低  
喜君來白社值我在青谿  
應笑於陵子遺榮自灌畦

洛中士君子多以平泉見呼愧  
獲方外之名因

以此詩為報奉寄劉賓客

非高柳下逸自愛竹林閒才異居東里愚因在北山徑  
荒寒未掃門設晝長闌不及鷗夷子悠悠煙水間

早春至言禪公法堂憶平泉別業

昔我伊原上孤遊竹樹間人依紅桂靜鳥傍碧潭閒松  
蓋低春雪藤輪倚暮山永懷桑梓邑衰老若為還

峽山亭月夜獨宿對櫻桃花有懷伊川別墅

皎月照芳樹鮮葩含素輝愁人惜春夜達曙想巖扉風

靜陰當砌露濃香入衣恨無金谷妓為我奏思歸

春暮思平泉雜咏

遠村寒食後細雨度川來芳草連谿合梨花映墅開  
槿籬懸落照松逕長新苔向夕亭臯望遊禽幾處回

書樓晴望

幽人居世外久厭市朝喧蒼翠連雙闕微茫認九原  
殘虹映鞏樹斜日照輶轅薄暮柴扉掩誰知仲蔚園

瀑泉亭

向老多悲恨，悽然念一丘。  
巖泉終古在，風月幾年遊。  
閣饒佳樹，菱潭有釣舟。  
不知羊叔子，名與峴山留。

東谿

近蓄東谿水，悠悠起淥波。  
綵駕留不去，芳草日應多。  
夾岸生奇篠，緣巖覆女蘿。  
蘭橈思無恨，為感濯纓歌。

西園

西園最多趣，永日自忘歸。  
石瀨流清淺，峰岑澹翠微。  
曉翻紅藥艷，晴寫碧潭輝。  
獨望娟娟月，宵分未掩扉。

竹徑

野竹自成徑繞溪三里餘  
檀欒被層阜蕭瑟蔭清渠  
日落見林靜風行知谷虛  
田家故人少誰肯共焚魚

花樂欄

蕙草春已碧蘭花秋更紅  
四時發英艷三徑滿芳叢  
秀色濯清露鮮輝搖惠風  
王孫未知返幽賞意誰同

釣臺

我有嚴湍思懷人訪故臺  
客星依釣隱仙石逐槎回  
倒

影含清泚凝陰長碧苔飛泉信可挹幽客未歸來

鹿石

林中有奇石髣髴獸潛行乍似依巖桂還疑食野草茸  
長綠蘚映斑細紫苔生不是見羈者何勞如頽纓

白鷺鷥

余心憐白鷺潭上日相依拂石疑星落凌風似雪飛碧  
沙嘗獨立清景自忘歸所樂惟煙水徘徊戀釣磯

奉和太原節度使張公弘靖山亭書懷

岩石在朱戶風泉當翠樓始知峴亭賞難與清暉留餘  
景淡將夕凝風輕欲收東山有歸志方接赤松遊

招隱山觀玉蘂樹戲書即事奉寄江西沈大夫

閣老

玉蘂天中樹金閨昔共窺落英開舞雪密葉乍低帷舊  
賞煙霄遠前歡歲月移今來想顏色還似憶瓊枝

寄題惠林李侍郎舊館

棟宇非吾室煙山是我鄰百齡惟待盡一世樂長貧半

壁懸秋日空林滿夕塵  
祗應雙鶴弔松路更無人

寄茅山孫鍊師

何地最翛然華陽第八天  
松風清有露蘿月淨無煙  
乍警瑤壇鶴時嘶玉樹蟬  
欲馳千里戀惟有鳳門泉

漢州月夕遊房太尉西湖

丞相鳴琴地何年閉玉徽  
偶因明月夕重敞故樓扉  
桃柳溪空在芙蓉客暫依  
誰憐濟川楫長與夜舟歸

重題



晚日臨寒渚微風發擢謳鳳池波自闊魚水運難留亭  
古思宏棟川長夜憶舟想公高世意祇似冶城遊

近於伊川卜山居將命者畫圖而至欣然志感  
聊賦此詩兼寄上浙東元相公大夫使求青  
田胎化鶴

弱歲弄詞翰遂叨明主恩懷章過越邸建旆守吳門西  
地陰難駐東臯意尚存慙逾六百石愧負五千言寄世  
知嬰繳辭榮類觸藩欲追綿上隱況近子平村邑有桐

鄉愛山餘黍谷暄  
免非迹相地乃是故侯園  
野竹多微徑  
岩泉豈一源  
映池方樹密  
傍澗古藤繁  
筇枝堪扶老  
羲牛已服轅  
只應將唳鶴  
幽谷共翩翻

思在山居日偶成此詠邀松陽子同作

閒思昔歲事  
忽忽念伊川  
乘月步秋坂  
滿山聞石泉  
回塘碧潭映  
高樹綠蘿懸  
露下呌田鶴  
風來嘶晚蟬  
懷茲長在夢  
歸去且無緣  
幽谷人未至  
蘭苔應更鮮

奉和韋侍御陪相公遊開義五言六韻

羊公追勝槩茲地暫逍遙風景同南峴丹青見北朝石  
渠清夏氣高樹激鮮飈念法珍禽集聞經醉象調偶分  
甘露味偏覺衆香饒為問毗城內餘薰幾日銷

清泠池懷古

區囿三百里常聞駟馬來旌旗朝角道簫鼓燕平臺追  
昔賦文雅從容遊上才竹園秋水淨風苑雪煙開牛禍  
釁將發羊孫謀始回袁絲徒仗劒長孺欲成灰興廢由  
所感湮淪斯可哀空留故池雁刷羽尚徘徊

奉送相公十八丈鎮揚州

千騎風生大旆舒  
春江重到武侯廬  
共懸龜印銜新綬  
同憶鱣庭訪舊居  
取履橋邊啼鳥換  
釣璜溪畔落花初  
今來却笑臨邛客  
入蜀空馳使者車

謫仙嶺南道中作

嶺水爭分路轉迷  
桄榔葉暗蠻溪愁  
衝毒霧逢蛇草  
畏落沙蟲避燕泥  
五月畬田收火米  
三更津吏報潮雞  
不堪腸斷思鄉處  
紅槿花中越鳥啼

到惡溪夜泊蘆島

甘露花香不再持，遠公應怪負前期。  
青蠅豈獨悲虞氏，黃犬應聞笑李斯。  
風雨瘴昏蠻日月，煙波魂斷惡溪時。  
嶺頭無限相思淚，泣向寒梅近北枝。

長安秋夜

內官傳詔問戎機，載筆金鑾夜始歸。  
萬戶千門皆寂寂，月中清露點朝衣。

寄茅鍊師

石上谿蓀發紫茸  
碧山幽藹水溶溶  
菖花定是無人見  
春日惟應羽客逢

獨尋蘭渚翫遲暉  
閒倚松牕望翠微  
遙想春山明月曙  
玉壇清磬步虛歸

懷京國

海上東風犯雪來  
鴈前先折鏡湖梅  
遙思禁苑青春夜  
坐待宮人畫詔迴

周賀

字南卿

送康紹歸建鄴

南朝秋色滿君去意如何帝業空城在民田壞塚多月  
圓臺獨上栗綻寺頻過籬下西江水相思見白波

再過王輅原居納涼

夏天多憶此早晚得秋分舊月來還見新蟬坐忽聞扇  
風調病葉溝水隔殘雲別有微涼處從容不似君

同朱慶餘宿翊西上人房

溪僧還共謁相與坐中天屋雪凌高燭山茶稱遠泉夜

清更徹寺空濶雁衝天莫怪多時話重來又隔年

出關寄賈島

舊鄉無子孫誰共老青門迢遞早秋路別離深夜村伊  
流背遠客岳響答啼猿去後期招隱何當此復言

懷西峰隱者

灌木藏岑色天寒望即愁高齋何日去遠瀑入城流臘  
近溪書絕燈殘夜雪稠邇來相憶處枕上若吟休

旅懷



不覺月又盡未歸還到春雪通廬岳夢樹匝草堂身澤  
雁和寒露江槎帶遠新何年自此去舊國祇荒鄰

長安送人

上國多離別年年渭水濱空將未歸意說向欲行人雁  
度池塘月山連井邑春臨分惜攜手日暮一沾巾

春日寄友人

春居無俗喧時立澗前村路遠少來客山深多過猿帶  
巖松色老臨水杏花繁除憶文流外何人更可言

送僧歸江南

洗足北林去遠途今已分麻衣行嶽色竹杖帶湘雲飢  
鼠緣危壁寒狸出壞墳前峰一聲磬此夕不同聞

贈皎然上人

竹庭瓶水新深稱北牕人講罷見黃葉詩成尋舊鄰錫  
陰迷坐石池淨露齋身苦作南行約勞生始問津

旅情

黃葉下堦頻徐徐起病身殘秋螢出盡獨夜雁來新別

業去千里舊鄉空四鄰孤舟尋幾度又識岳陽人

山居秋思

一從雲水住曾不下西岑落木孤猿在秋庭積霧深泉  
流通井脉蟲響出墻陰夜靜溪聲徹寒燈尚獨吟

秋思

楊柳已秋思楚田仍刈禾歸心病起切敗葉夜來多細  
雨城蟬噪殘陽嶠客過舊山餘業在香隔洞庭波

早春越中遊留故人

此行經歲近惟約半年迴野渡人初過前山雲未開雁  
羣逢燒斷林色映川來清夜蘆中客嚴家舊釣臺

送僧還南岳

辭僧下水柵因夢嶽鐘聲遠路獨歸寺幾時重到城風  
高黃葉落雨絕夜堂清自說溪居後隣州亦不行

投江州張郎中

要地無閒日仍容冒謁頻借山年涉閨寢郡月逾旬驛  
徑曾衝雪方泉省滌塵隨行溪路細接話草堂新減藥

痊餘癖飛書苦問貧  
噪蟬離宿穀吟石寄秋身鍊句貽  
箱篋懸圖見蜀岷使君匡嶽近終作社中人

秋晚歸廬山留別道友

病起陵陽思翠微  
秋風動後着行衣  
月生石齒人同見  
霜落木梢愁獨歸  
已許衲僧修靜社  
便將樵叟對閒扉  
不嫌舊隱相隨去  
廬岳臨天好息機

送廬嶽僧

浪匝湓城岳壁青  
白頭僧去掃禪局  
龕燈度雪補殘衲


山日上軒看舊經泉水帶冰寒溜溢薛蘿新雨曙煙腥  
已知身事非吾道甘臥荒齋竹滿庭

潯陽與孫郎中讌回

別酒已酣春漏前他人扶上北歸船潯陽渡口月未上  
漁火照江仍獨眠

寄長孫中丞

潯陽却到是何日此地今無舊使君長憶窮冬宿廬岳  
瀑泉冰折共僧聞



石倉歷代詩選卷七十三

欽定四庫全書

集部

石倉歷代詩選卷七十四

詳校官庶吉士臣范逢恩

侍讀臣孫球覆勘

總校官進士臣朱 鈐

校對官中書臣王慶長

謄錄監生臣王初桐



欽定四庫全書

右倉歷代詩選卷七十四

明 曹學佺 撰

晚唐一

李商隱

字義山  
懷州人

宮中曲

雲母瀟宮月夜白于水  
賺得羊車來低扇遮黃子  
水精不覺冷自刻鴛鴦翅  
蠶縷茜香濃正朝纏左臂  
巴牋

兩三幅滿寫承恩字欲得識青天昨夜蛟龍是

和鄭愚贈汝陽王孫家箏妓二十韻

水霧怨何窮秦絲嬌未已寒空煙霞高白日一萬里碧  
嶂愁不行濃翠遙相倚茜袖捧瓊姿皎日丹霞起孤猿  
耿幽寂西風吹白芷迴首蒼梧深女蘿閉山鬼荒郊白  
鱗斷別浦晴霞委長釣壓河心白道連地尾秦人昔富  
家綠窗聞妙旨鴻驚雁背飛象牀殊故里因令五十絲  
中道分宮徵斗粟配新聲娣姪徒纖指風流大堤上悵

望白門裏蠹粉實雌絃燈光冷如水羌管促蠻柱從醉  
吳宮耳滿內不掃簷君王對西子初花慘朝露冷臂淒  
愁髓一曲送連錢遠別長于死玉砌銜紅蘭粧窗結碧  
綺九門十二闌清晨禁桃李

房中曲

薔薇泣幽素翠帶花錢小嬌郎癡若雲抱日西簾曉枕  
是龍宮石割得秋波色玉簾失柔膚但見蒙羅碧憶得  
前年春未語悲含辛歸來已不見錦瑟長于人今日礪

底松明日山頭蘂愁到天池翻相看不相識

無題

八歲偷照鏡長睂已能畫十歲去踏青芙蓉作裙衩十  
二學彈箏銀甲不曾卸十四藏六親懸知猶未嫁十五  
泣春風背立鞦韆下

效長吉

長長漢殿睂窄窄楚宮衣鏡好鸞空舞簾疎燕誤飛君  
王不可問昨夜約黃歸

李夫人

蠻絲繫條脫妍眼和香屑壽宮不惜鑄南人柔腸早被  
秋眸割清澄有餘幽素香鰥魚渴鳳真珠房不知瘦骨  
類氷井更許夜簾通曉霜土花漠碧雲茫茫黃河欲盡  
天蒼蒼

燕臺詩四首

風光冉冉東西陌幾日嬌魂尋不得蜜房羽客類芳心  
冶葉倡條徧相識暖藹輝遲桃樹西高鬟立共桃枝齊

雄龍雌鳳杳何許絮亂絲繁天亦迷醉起微陽若初曙  
映簾夢斷聞殘語愁將鐵網罥珊瑚海闊天翻迷處所  
衣帶無情有寬窄春煙自碧秋霜白研丹擘石天不知  
願得天牢鑊冤魄夾羅委篋單綃起香眠冷襯瑱瑱佩  
今日東風自不勝化作幽光入西海

右春

前閣雨簾愁不卷後堂芳樹陰陰見石城景物類黃泉  
夜半行郎空拓彈綾扇喚風闔闔天輕帷翠幕波淵旋  
蜀魂寂寞有伴未幾夜瘴花開木縣桂宮流影光難取

媽薰蘭破輕輕語直教銀漢墮懷中未遣星妃鎮來去  
濁水清波何異源濟河水清黃河渾安得薄霧起綳屨  
手接雲輶呼太君

右夏

月浪衡天天宇濕涼蟾落盡疎星入雲屏不動掩孤嘯  
西樓一夜風箏急欲織相思花寄遠終日相思却相怨  
但聞北斗聲迴環不見長河水清淺金魚鰈斷紅桂春  
古時塵滿鴛鴦茵堪悲小苑作長道玉樹未憐亡國人  
瑤瑟悵悵藏楚弄越羅冷薄金泥重簾鉤鸚鵡夜驚霜

喚起南窓繞雲夢雙瑞丁丁聯尺素內記湘川相識處  
歌唇一世銜兩着可惜馨香手中故

右秋

天東日出天西下雌鳳孤飛女龍寡青溪白石不相望  
堂中遠甚蒼梧野凍壁霜華交隱起芳根中斷香心死  
浪乘畫舸憶蟾蜍月娥未必嬋娟子楚管蠶絃愁一槩  
空城罷舞腰支在當時歡向掌中銷桃葉桃根雙姊妹  
破鬟倭墮凌朝寒白玉燕釵黃金蟬風車雨馬不持去

蠟燭啼紅怨天曙

右冬



河內詩

鼙鼓沈沈虬水咽秦絲不上蠻絃絕嫦娥衣薄不禁寒  
蟾蜍夜艷秋河月碧城冷落空濛煙簾輕幕重金鈎欄  
靈香不下兩皇子孤星直上相風竿八桂林邊九芝草  
短襟小鬢相逢道入門暗數一千春願去閨年留月小  
梔子交加香蓼繁停辛佇苦留待君

其二

閨門日下吳歌遠陂路綠菱香滿滿後溪暗起鯉魚風

船旗閃斷芙蓉輪傾身奉君畏身輕雙橈兩槳樽酒清  
莫因風雨罷團扇此曲斷腸惟此聲低樓小徑城南道  
猶自金鞍對芳草

射魚曲

思牢弩箭磨青石繡額蠻渠三虎力尋潮背日俟泗鱗  
貝闕夜移鯨失色纖纖粉簌馨香餌綠鴨迴塘養龍水  
含永漢語遠于天何由迴作金盤死

燒香曲

鈿雲蟠蟠牙比魚孔雀翅尾蛟龍鬚漳宮舊樣博山爐  
楚嬌捧笑開芙蓉八蠶繭絲小分炷獸炭微紅隔雲母  
白天月澤寒未永金虎含秋向東吐玉珮呵光銅照昏  
簾波日暮衝斜門西來欲上茂陵樹柏梁已失栽桃魂  
露庭月井大紅氣輕衫薄袖當君意蜀殿瓊人伴夜深  
金鷺不問殘燈事何當巧笑君懷度襟灰為土填清露

風雨

淒涼寶劍篇羈泊欲窮年黃葉仍風雨青樓自管絃新

知遭薄俗舊好隔良緣心斷新豐酒銷愁斗幾千

離思

氣盡前溪舞心酸子夜歌峽雲尋不得溝水欲如何朔  
雁傳書絕湘筠染淚多無由見顏色還自託微波

令孤舍人說昨夜西掖翫月因戲贈

昨夜玉輪明傳聞近太清涼波衝碧瓦曉暈落金莖露  
索秦宮井風絃漢殿箏幾時縣竹頌擬薦子虛名

歸墅

行李踰南極旬時到舊鄉  
楚芝應徧紫鄧橘未全黃  
渠濁村舂急帘高社酒香  
故山歸夢喜先入讀書堂

哭劉司戶

離居星歲易失望死生分  
酒甕凝餘桂書籤冷舊芸  
江風吹雁急山水帶蟬曛  
一叫千迴首天高不為聞

桂林

城窄山將壓江寬地共浮  
東南通絕域西北有高樓  
神護青楓岸龍移白石湫  
殊鄉竟何禱蕭鼓未曾休

贈柳

章臺從掩映  
郢路更參差  
見說風流極  
來當婀娜時  
橋回行欲斷  
堤遠意相隨  
忍放花如雪  
青樓撲酒旗

謔柳

已帶黃金縷  
仍飛白玉花  
長時須拂馬  
密處少藏鴉  
眉細從他歛  
腰輕莫自斜  
玳梁誰道好  
偏擬映盧家

韓翃舍人即事

萱草含丹粉  
荷花抱綠房  
鳥應悲蜀帝  
蟬是怨齊王  
通

內藏珠府應官解玉坊橋南荀令過十里送衣香

子初全溪作

全溪不可到况復盡餘醅漢苑生春水昆池換劫灰戰  
蒲知雁唼皴月覺魚來清興恭聞命言詩未敢迴

越燕二首

上國社方見此鄉秋不歸為矜皇后舞猶著羽人衣拂  
水斜紋亂銜花片影微盧家文杏好試近莫愁飛

將泥紅蓼岸得草綠楊村命侶添新意安巢復舊痕去

應逢阿母來莫害皇孫記取丹山鳳今為百鳥尊

無題

照梁初有情出水舊知名裙衩芙蓉小釵茸翡翠輕錦  
長書鄭重看細恨分明莫近彈碁局中心最不平

月

池上與橋邊難忘復可憐簾開最明夜簾卷已涼天流  
處水花急吐時雲葉鮮姮娥無粉黛只是逞嬋娟

贈宗魯筇竹杖



大夏資輕策全溪贈所思  
靜憐穿樹遠滑想過苔遲  
鶴怨朝還望僧閒暮有期  
風流真底事常欲傍清羸

壬申七夕

已駕七香車心心待曉霞  
風輕惟響珮日薄不嬌花  
桂嫩傳香遠榆高送影斜  
成都過卜肆曾妬識靈槎

判春

一桃復一李井上占年芳  
笑處如臨鏡窺時不隱牆  
敢言西子短誰覺宓妃長  
珠玉終相類同名作夜光

曉起

擬杯當曉起呵鏡可微寒  
隔箔山櫻熟褰帷挂燭殘  
書長為報晚夢好更尋難  
影響輸雙蝶偏過舊畹蘭

寄裴衡

別地蕭條極如何更獨來  
秋應為紅葉雨不厭青苔  
沈約偏能瘦蒲仁豈是才  
離情堪底寄惟有冷于灰

小桃園

竟日小桃園休寒亦未暄  
坐鶯當酒重送客出牆繁  
啼

久艷粉薄舞多香雪翻猶憐未圓月先出照黃昏

所居

窻下尋書細溪邊坐石平水風醒酒病霜日曝衣輕雞黍隨人設蒲魚得地生前賢無不謂容易即遺名

訪秋

酒薄吹還醒樓危望已窮江臯當落日帆席見歸風煙帶龍潭白霞分鳥道紅殷勤報秋意只是有丹楓

昭州

桂水春猶早昭州日正西  
虎當官路鬪猿上驛樓啼繩  
爛金沙井松乾乳洞梯鄉音  
吁可駭仍有醉如泥

陳後宮

玄武關新苑龍舟燕幸頻  
渚蓮叅法駕沙鳥犯鈎陳  
壽獻金莖露歌翻玉樹塵  
夜來江令醉別詔宿臨春

獻寄舊府開封公

幕府三年遠春秋一字褒書  
論秦逐客賦續楚離騷地  
理南溟闊天文北極高  
酬恩撫身世未覺勝鴻毛

題鄭大有隱居

近子晉憩  
鶴臺處

結構何峯是喧閤此地分石梁高瀉月樵路細侵雲偃  
卧蛟螭室希夷鳥獸羣近知西嶺上玉管有時聞

江上

萬里風來地清江北望樓雲通梁苑路月帶楚城秋刺  
字從漫滅歸途尚阻脩前程更煙水吾道豈淹留

題李上墓壁

舊著思玄賦新編雜擬詩江庭猶近別山舍得幽期嫩

割周顥韭肥烹鮑照葵鮑聞南燭酒仍及撥醅時

即日

桂林聞舊說曾不異炎方山響匡牀語花飄度臘香幾  
時逢雁足著處斷猿腸獨撫青青桂臨城憶雪霜

春宵日遣

地勝遺塵事身閒念歲華晚晴風過竹深夜月當花石  
亂知泉咽苔荒任徑斜陶然恃琴酒忘却在山家

七夕偶題

寶婺搖珠珮嫦娥照玉輪靈歸天上匹巧遺世人花  
果香千戶笙竽溢四隣明朝曬犢鼻方信阮郎貧

寒食行次冷泉驛

歸途仍近節旅宿倍思家獨夜三更月空庭一樹花介  
山當驛秀汾水遶關斜自怯春寒苦那堪禁火賒

寄華嶽孫逸人

靈嶽幾千仞老松逾百尋攀崖仍躡壁嗽葉復眠陰海  
上呼三島齋中戲五禽惟應逢阮籍長歎作鷺音

北青蘿

殘陽西入崦茅屋訪孤僧落葉人何在寒雲路幾層獨  
敲初夜磬閒倚一枝藤世界微塵裏吾寧愛與憎

幽人

丹竈三年火蒼崖萬歲藤樵歸逢說虎碁罷正留僧星  
斗同秦分人煙接漢陵東流清渭苦不盡照衰興

詠雲

捧月三更斷藏星七夕明纔聞飄迥路旋見隔重城潭



暮隨龍起河秋壓雁聲只因惟宋玉知是楚神名

夜出西溪

東府憂春盡西溪許日曛月澄新漲水星見欲銷雲柳  
好休傷別松高莫出羣軍書雖倚馬猶未當能文

九月於東逢雪

舉家忻共報秋雪墮前峯嶺外他年憶於東此日逢粒  
輕還自亂花薄未成重豈是驚離鬢應來洗病容

僧院牡丹

葉薄風才倚枝輕霧不勝開先如避客色淺為依僧粉  
壁正蕩水綳幃初卷燈傾城惟待笑要裂幾多繒

河清與趙氏昆季讌集得擬杜工部

勝槩殊江右佳名逼渭川虹收青嶂雨鳥沒夕陽天客  
鬢行如此滄波坐渺然此中真得地漂蕩釣魚船

城上

有客虛投筆無寥獨上城沙禽失侶遠江樹著陰輕邊  
遽稽天討軍須竭地征賈生遊刃極作賦又論兵

如有

如有瑤臺客相難復索歸芭蕉開綠扇  
菡萏薦紅衣浦外傳光遠煙中結響微  
良宵一寸艷回首是重幃

清夜怨

含淚坐春宵聞君欲度遼綠池荷葉嫩  
紅砌杏花嬌曙月當窓滿征雲出塞遙  
畫樓終日閉清管為誰調

訪隱

路到層峯斷門依老樹開月從平楚轉  
泉自上方來薤

白羅朝饌松黃暖夜杯相留笑孫綽空解賦天台

歸來

舊隱無何別歸來始更悲難尋白道士不見惠禪師草  
徑蟲鳴急沙渠水下遲却將波浪眼清曉對紅梨

錦瑟

錦瑟無端五十絃一絃一柱思華年莊生曉夢迷蝴蝶  
望帝春心託杜鵑滄海月明珠有淚藍田日暖玉生煙  
此情可待成追憶只是當時已惘然

潭州

潭州官舍暮樓空，今古無端入望中。  
湘淚淺深滋竹色，楚歌重疊怨蘭叢。  
陶公戰艦空灘雨，賈傅承塵破廟風。  
目斷故園人不至，松醪一醉與誰同。

送崔珣往西川

年少因何有旅愁，欲為東下更西遊。  
一條雪浪吼巫峽，千里火雲燒益州。  
卜肆至今多寂寞，酒壚從古擅風流。  
浣花牋紙桃花色，好為題詩詠玉鉤。

寄令狐學士

秘殿崔嵬拂彩霓  
曹司今在殿東西  
賡歌太液翻黃鵠  
從獵陳倉獲碧雞  
曉飲豈知金掌迴  
夜吟偏訝玉繩低  
釣天雖許人間聽  
閭闔門多夢自迷

少年

外戚平羌第一功  
生平二十有重封  
直登宣室螭頭上  
橫過甘泉豹尾中  
別館覺來雲雨夢  
後門歸去蕙蘭叢  
灞陵夜獵隨田竇  
不識寒郊自轉蓬

藥轉

鬱金堂北畫樓東  
換骨神方上藥通  
露氣暗連青桂苑  
風聲偏獵紫蘭叢  
長籌未必輸孫皓  
香棗何須問石崇  
憶事懷人兼得句  
翠衾歸卧繡簾中

隋宮

紫泉宮殿鏤煙霞  
欲取燕城作帝家  
玉璽不緣歸日角  
錦帆應是到天涯  
于今腐草無螢火  
終古垂楊有暮鴉  
地下若逢陳後主  
豈宜重問後庭花

重遊飛泉觀題故梁道士宿龍池

西巖泉落水容寬  
靈物蜿蜒黑處蟠  
松葉正秋琴韻響  
菱花初曉鏡光寒  
雲開星月浮山殿  
雨過風雷遶石壇  
仙客不歸龍亦去  
緇畦長滿此池乾

將為南行陪尚書崔公宴海榴堂

朝譙華堂暮未休  
幾人偏得謝公留  
風傳鼓角霜侵戟  
雲卷笙歌月上樓  
賓館盡開徐穉榻  
客帆空戀李膺舟  
謾誇書劍無歸處  
水遶山長步步愁



贈鄭處士

道傍年少莫矜誇，心在重霄鬢未華。  
揚子可曾過北里，魯人何必敬東家。  
寒雲曉散千峯雪，暖雨晴開一徑花。  
且賣湖田釀春酒，與君書劒是生涯。

哭楊攀處士

先生憂道樂清貧，白髮終為不仕身。  
嵇阮沒來無酒客，應劉亡後少詩人。  
山前月照孤墳曉，溪上花開舊宅春。  
昨夜回舟更惆悵，至今鐘磬滿南隣。

宿望亭館寄蘇州一二同志

候館人稀夜自長  
姑蘇城遠樹蒼蒼  
江湖水落高樓迥  
河漢秋歸廣簾涼  
月轉碧梧移鵲影  
露低紅葉濕螢光  
西園詩侶應多思  
莫醉笙歌掩畫堂

夜間寄郡中文士

盧橘含花處處香  
老人依舊卧青漳  
心同客舍驚秋早  
迹似僧齋厭夜長  
風卷翠簾琴自響  
露凝朱閣簟先涼  
明朝欲醉文中彥  
猶覺吟聲帶越鄉

將歸姑蘇南樓餞送李明府

無處登臨不繫情，一憑春酒醉高城。  
暫移羅綺見山色，纔駐管絃聞水聲。  
花落西亭添別夢，柳陰南浦促歸程。  
前期迢遞今宵短，更倚朱闌待月明。

留別趙端公

海門征棹赴龍瀧，暫寄華筵倒玉缸。  
簫鼓散時逢夜雨，綺羅分處下秋江。  
孤帆已過滕王閣，高榻留眠謝守窓。  
却願煙波阻風雪，待君同拜碧油幢。

元處士自洛歸宛陵山居見示詹事相公餞行  
紫霄峯下絕韋編舊隱相如結襪前月落尚留東閣醉  
風高還憶北窓眠江城夜別瀟瀟雨山檻晴歸漠漠煙  
一頃豆花二頃竹想應拋却釣魚船

長慶寺遇常州阮秀才

高閣晴軒對一峯毗陵書客此相逢晚收紅葉題詩徧  
秋待黃花釀酒濃山館日斜喧鳥雀石潭波動戲魚龍  
上方有路應知處疎磬寒蟬樹幾重

對雪

寒氣先侵玉女扉清光旋透省郎闌梅花大庾嶺頭發  
柳絮章臺街裏飛欲舞定隨曹植馬有情應濕謝莊衣  
龍山萬里無多遠留待行人二月歸

辛未七夕

恐是仙家好別離故教迢遞作佳期由來碧落銀河畔  
可要金風玉露時清漏漸移相望久微雲未接過來遲  
豈能無意酬烏鵲惟與蜘蛛乞巧絲

銀河吹笙

悵望銀河吹玉笙樓寒院冷接平明重衾幽夢他年斷  
別樹羈雌昨夜驚月榭故香因雨發風簾殘燭隔霜清  
不須浪作緱山意湘瑟秦簫自有情

宿晉昌亭聞鶯禽

羈緒鰥鰥夜景侵高窓不掩見鶯禽飛來曲渚煙方合  
過盡南塘樹更深代馬嘶和榆塞笛楚猿吟雜橘村砧  
失羣掛木知何限遠隔天涯共此心

深宮

金殿銷香閉綺籠  
玉壺傳點咽銅龍  
狂飈不惜蘿陰薄  
清露偏知桂葉濃  
斑竹嶺邊無限淚  
景陽宮裏及時鐘  
豈知為雨為雲處  
只有高唐十二峯

淚

衣巷長年怨綺羅  
離情終日思風波  
湘江竹上痕無限  
峴首碑前灑幾多人  
去紫臺秋入塞兵  
殘楚帳夜聞歌  
朝來灞水橋邊問  
未抵青袍送玉珂

出關宿盤豆館對叢蘆有感

蘆葉梢梢夏景深  
郵亭暫欲灑塵襟  
昔年曾是江南客  
此日初為關外心  
思子臺邊風自急  
玉娘湖上月應沈  
清聲不遠行人去  
一任荒城伴夜砧

贈從兄閬之

悵望人間萬事違  
秘書清夢約忘機  
荻花村裏魚標在  
石蘚庭中鹿跡微  
僻徑定携僧共入  
寒塘好與月相依  
城中獬犬憎蘭佩  
莫損幽芳久不歸



無題

鳳尾香羅薄幾重  
碧文圓頂夜深縫  
扇裁月魄羞難掩  
車走雷聲語未通  
曾是寂寥金燼暗  
斷無消息石榴紅  
斑騅只繫垂楊岸  
何處西南待好風

贈鄭諫處士

浪迹江湖白髮新  
浮雲片片是吾身  
寒歸山觀隨碁局  
暖入沙汀逐釣綸  
越桂留烹張翰鱠  
蜀薑供煮陸機尊  
相逢一笑憐疎放  
他日扁舟有故人

寫意

燕雁迢迢隔上林，高秋望斷正長吟。  
人間路有潼江險，天外山惟玉壘深。  
日向花間留返照，雲從城上結層陰。  
三年已制思鄉淚，更入新年恐不禁。

和人題真娘墓

虎丘山下劒池邊，長遣遊人歎逝川。  
胥樹斷絲悲舞席，出雲清梵想歌筵。  
柳著空吐含顰葉，榆莢還飛買笑錢。  
一自香魂招不得，祇應江上獨嬋娟。

水齋

多病欣依有道邦  
南塘晏起想秋江  
捲簾飛燕還拂水  
開戶暗蟲猶打窗  
更闌前頭已披卷  
仍斟昨夜未開缸  
誰人為報故交道  
莫惜鯉魚時一雙

回中牡丹為雨所摧

下苑他年未可追  
西州今日忽相期  
水亭暮雨寒猶在  
羅薦春香煖不知  
無蝶殷勤收落蘂  
有人惆悵卧遙帷  
章臺街裏芳菲伴  
且問宮腰損幾枝

南朝

玄武湖中玉漏催雞鳴埭口繡襦迴誰言瓊樹朝朝見  
不及金蓮步步來敵國軍營漂木枿前朝神廟鏤煙煤  
滿宮學士皆顏色江令當年只費才

即日

一歲林花即日休江間亭下悵淹留重吟細把真無奈  
已落猶開未放愁山色正來銜小苑春陰只欲傍高樓  
金鞍忽散銀壺滴更醉誰家白玉鉤

井絡

井絡天彭一掌中，謾誇天設劔為峯。  
陣圖東聚燕江口，邊柝西懸雪嶺松。  
堪歎故君成杜宇，可能先主是真龍。  
將來為報姦雄輩，莫向金牛訪舊蹤。

柳

江南江北雪初消，漠漠輕黃惹嫩條。  
灞岸已攀行客手，楚宮先騁舞姬腰。  
清明帶雨臨官道，晚日含風拂野橋。  
如線如絲正牽恨，王孫歸路一何遙。

九日

曾共山翁把酒時  
霜天白菊遶階墀  
十年泉下無消息  
九日樽前有所思  
不學漢臣栽苜蓿  
空教楚客詠江離  
郎君官貴施行馬  
東閣無因再得窺

晨自竹逕至龍興寺崇隱上人院

佛寺通南徑  
僧堂倚北坡  
藤陰迷晚竹  
苔滑仰晴莎  
病憶春前別  
閑宜雨後過  
石橫聞水遠  
林缺見山多  
欲結三天社  
初降十地魔  
素龍來有窟  
靈鶴去無窠  
客路隨

萍梗鄉園失薜蘿  
禪心如可學  
不藉魯陽戈

柳枝五首

井序

柳枝洛中里娘也父饒好賈風波死湖上其母不念  
他兒子獨命柳枝生十七年塗粧綰髻未嘗竟已復  
起去吹葉嚼藥調絲擲管作天風海濤之曲幽憶怨  
斷之音居其旁與其家接故往來者聞十年尚相與  
疑其醉眠夢物斷不娉余從昆讓山比柳枝居為近  
他日春曾陰讓山下馬柳枝南柳下詠余燕臺詩柳

枝驚問誰人為是讓山謂曰此吾里中少年叔耳柳  
枝手斷長帶結讓山為贈叔乞詩明日余比馬出其  
巷柳枝了鬟畢粧抱立扇下風鄣一袖指曰若叔  
是句後三日隣當去濺裙水上以博山香待與郎  
俱過余諾之會所友有偕當詣京師者戲盜余卧  
裝以先不果留雪中讓山至且曰東諸侯取去矣  
明年讓山復東相背於戲上因寓詩以墨其故處云  
花房與蜜脾蜂雄蛺蝶雌同時不同類那復更相思



其二

本是丁香樹春條結始生  
玉作彈碁局中心亦不平

其三

嘉瓜引蔓長碧玉冰寒漿  
東陵雖五色不忍值牙香

其四

柳枝井上蟠蓮葉浦中乾  
錦鱗與繡羽水陸有傷殘

其五

畫屏錦步障物自成雙  
如何湖上望只是見鴛鴦

微雨

初隨林靄動稍共夜涼分  
窗迴侵燈冷庭虛近水聞

百果嘲櫻桃

珠寶雖先熟瓊草縱早開  
流鶯猶故在爭得諱含來

櫻桃答

衆果莫相誚天生名品高  
何因古樂府惟有鄭櫻桃

悼傷後赴東蜀辟至散關遇雪

劍外從軍遠無家與寄衣  
散關三尺雪迴夢舊鴛機

樂遊原

向晚意不適驅車登古原夕陽無限好只是近黃昏

聽鼓

城頭疊鼓聲城下暮江清欲問漁陽慘時無禰正平

追代盧家人嘲堂內

道却橫波字人前莫漫羞只應同楚水長短入淮流

天涯

春日在天涯天涯日又斜鶯啼如有淚為濕最高花

夜意

簾垂幕半捲枕冷被仍香如何為相憶魂夢過瀟湘

滯雨

滯雨長安夜殘燈獨客愁故鄉雲水地歸夢不宜秋

夜雨寄北

君問歸期未有期巴山夜雨漲秋池何當共剪西窗燭  
却話巴山夜雨時

雜題

城郭休過識者稀  
哀猿啼處有柴扉  
滄江白石樵漁路  
日暮歸來雨滿衣

端居

遠書歸夢兩悠悠  
只有空牀敵素秋  
階下青苔與紅樹  
雨中寥落月中愁

過鄭廣文舊居

宋玉平生恨有餘  
遠循三楚弔三閭  
可憐留著臨江宅  
異代應教庾信居

莫愁

雪中梅下與誰期  
梅雪相兼一萬枝  
若是石城無艇子  
莫愁還自有愁時

宮辭

君恩如水向東流  
得寵憂移失寵愁  
莫向樽前奏花落  
涼風只在殿西頭

瑤池

瑤池阿母綺窗開  
黃竹歌聲動地哀  
八駿日行三萬里

穆王何事不重來

鴛鴦

雌去雄來萬里天  
雲蘿滿眼淚潸然  
不須長結風波願  
鎖向金籠始兩全

代秘書贈弘文館諸校書

清切曹司近玉除  
比來秋興復何如  
崇文館裏丹霜後  
無限紅梨憶校書

即日

小鼎煎茶面曲池  
虬鬚道士竹間棋  
何人書破蒲葵扇  
記著南塘移樹時

嫦娥

雲母屏風燭影深  
長河漸落曉星沈  
嫦娥應悔偷靈藥  
碧海青天夜夜心

天津西望

虜馬崩騰忽一狂  
翠華無不到東方  
天津西望腸真斷  
滿眼秋波出苑牆



憶住一師

無事經年別遠公  
帝城鐘曉憶西峯  
煙爐銷盡寒燈晦  
童子開門雪滿松

昨夜

不辭鶻鴂妬年芳  
但惜流塵暗洞房  
昨夜西池涼露滿  
桂花吹斷月中香

寄蜀客

君到臨邛問酒壚  
近來還有長卿無  
金徽却是無情物

不許文君憶故夫

訪人不遇留別館

卿卿不惜瑣窗春  
去作長楸走馬身  
閒倚繡簾吹柳絮  
日高深院斷無人

池邊

玉管葭灰細細吹  
流鶯上下燕參差  
日西半遶池邊樹  
憶把枯條撼雪時

華師

孤鶴不睡雲無心衲衣筇杖來西林院門晝鎖迴廊靜  
秋日當階柿葉陰

代贈二首

樓上黃昏欲望休玉梯橫絕月中鉤芭蕉不展丁香結  
同向春風各自愁

東南日出照高樓樓上離人唱石州總把春山掃眉黛  
不知供得幾多愁

武夷山

只得流霞酒一杯空中簫鼓當時迴  
武夷洞裏生毛竹  
老盡曾孫更不來

訪隱者不遇成一絕

秋水悠悠浸野扉夢中來數覺來稀  
玄蟬去盡黃葉落  
一樹冬青人未歸

寄令狐郎中

嵩雲秦樹久離居雙鯉迢迢一紙書  
休問梁園舊賓客  
茂陵秋雨病相如

東還

自有仙才自不知  
十年長夢採華芝  
秋風動地黃雲暮  
歸去嵩陽尋舊師

七夕

鸞扇斜分鳳幄開  
星橋橫過鵲飛迴  
爭將世上無期別  
換得年年一度來

月夕

草下陰蟲葉上霜  
朱欄迢遞壓湖光  
兔寒蟾冷桂花白

此夜姮娥應斷腸

代應

本來銀漢是紅牆  
隔得盧家白玉堂  
誰與王昌報消息  
盡知三十六鵝鴦

暮秋獨遊曲江

荷葉生時春恨生  
荷葉枯時秋恨成  
深知身在情長在  
悵望江頭江水聲

夜冷

樹遶池寬月影多  
村砧塢笛隔風蘿  
西亭翠被餘香薄  
一夜將愁向敗荷

韋蟾

謝家離別正淒涼  
少傅臨岐賭佩囊  
却憶短亭迴首處  
夜來煙雨滿池塘

花下醉

尋芳不覺醉流霞  
倚樹沈眠日已斜  
客散酒醒深夜後  
更持紅燭賞殘花

石倉歷代詩選卷七十四



欽定四庫全書

石倉歷代詩選卷七十五

明 曹學佺 撰

晚唐二

杜牧

字牧之  
京兆人

長安送友人遊湖南

子性劇弘和愚衷深徧  
相舍囂曉中吾過何由鮮  
楚國饒風煙湘岸苦縈宛  
山密夕陽多人稀芳草遠  
青梅

繁枝低斑笋新梢短莫哭葵魚人酒醒且眠飯

雨中作

賤子本幽慵多為賢雋侮得州荒僻中更值連江雨一  
褐擁秋寒小窗侵竹塢濁醪氣色嚴皤腹餅罌古酣酣  
天地寬怳怳嵇劉伍但為適性情豈是藏鱗羽一世一  
萬朝朝醉中去

題池州弄水亭

弄水亭前溪颭颭翠綃舞綺席草芊芊紫嵐峯伍伍螭

蟠得形勢翬飛如軒戶一鏡奩曲堤萬九跳猛雨檻前  
燕雁栖枕上巴帆去叢筠侍脩廊密蕙媚幽圃杉樹碧  
為幢花駢紅作堵停樽遲晚月咽咽上幽渚客舟耿孤  
燈萬里人夜語漫流胃苔槎飢鳬曬雪羽玄絲落鉤餌  
冰鱗看吞吐斷霓天帔垂狂燒漢旗怒曠朗半秋曉蕭  
瑟好風露光潔疑可攬欲以襟懷貯幽抱吟九歌羈情  
思湘浦四時皆異狀終日為良遇小山浸石稜撐舟入  
幽處孤歌倚桂巖晚酒眠松塢紆餘帶竹村蠶鄉足砧

杵塍泉落環玕畦苗差纂組風俗知所尚豪強恥孤侮  
隣喪不相舂公租無詬負農時貴伏臘簪瑱事禮賂鄉  
校誠華筵征行產彊弩不能自勉去但愧來何暮故園  
漢上林信美非吾土

題宣州開元寺

南朝謝朓城東吳最深處亡國去如鴻遺寺藏煙塢樓  
飛九十尺廊環四百柱高高下下中風繞松桂樹青苔  
照朱閣白鳥兩相語溪聲入僧夢月色暉粉堵閱景無

日夕憑欄有今古留我酒一樽前山看春雨

許七侍御棄官東歸瀟灑江南頗聞自適高秋

企望題詩寄贈十韻

天子繡衣吏東吳美退居有園同庾信避事學相如  
蘭畹晴香嫩筠溪翠影疎江山九秋後風月六朝餘  
錦帙開詩軸青囊結道書霜嚴紅薜荔露沼白芙蓉  
睡雨高梧密棋燈小閣虛凍醪元亮秫寒鱸季鷹魚  
塵意迷今古雲情識卷舒他年雪中棹陽羨訪吾廬

偶遊石菴僧舍

宣州作

敬岑草浮光句  
吐水解脈益鬱乍  
怡融凝嚴忽頽圻  
梅類暖眠酣風緒  
和無力鳬浴漲汪  
汪雛嬌村幕幕落  
日美樓臺輕煙飾  
阡陌潏綠古津遠  
積潤苔基釋孰謂  
漢陵人來作江汀  
客載筆念無能捧  
籌慚所畫任轡偶  
追閒逢幽果遭適  
僧語淡如雲塵事  
繁堪織今古幾輩  
人而我何能息

題安州浮雲寺樓寄湖州張郎中

去夏疎雨餘同倚朱欄語當時樓下水今日到何處恨  
如春草多事與孤鴻去楚岸柳何窮別愁紛若絮

池州廢林泉寺

廢寺林溪上頽垣倚亂峯看栖歸樹鳥猶想過山鐘石  
路尋僧去此身應不逢

自宣州赴官入京路逢裴坦判官歸宣州因題贈  
敬亭山下百項竹中有詩人小謝城城高跨樓滿金碧  
下聽一溪寒水聲梅花落逕香繚繞雪白玉璫花下行

紫風酒旆挂朱閣半醉遊人聞弄笙我初到此未三千  
頭腦鈔利筋骨輕畫堂檀板秋拍碎一引有時聯十觥  
老閨腰下丈二組塵土高懸千載名重遊鬢白事皆改  
惟見東流春水平今日送君話前事高歌引劍還一傾  
江湖酒伴如相問終老煙波不計程

秋晚與沈十七舍人期遊樊川不至

邀侶以官絆泛然成獨遊川光初媚日山色正矜秋野  
竹疎還密巖泉咽復流杜村連瀟水晚步見垂鈎



送容州中丞赴鎮

交趾同星座龍泉似斗文燒香翠羽帳看舞鬱金裘鷁  
首衝瀧浪犀渠拂嶺雲莫教銅柱北空說馬將軍

憶遊朱坡四韻

秋草樊川路斜陽覆盎門獵逢韓嫣騎樹識館陶園帶  
雨經荷沼盤煙下竹村如今歸不得自戴望天盆

揚州二首

煬帝雷塘土迷藏有舊樓誰家唱水調明月滿揚州駿

馬宜閒出千金好暗遊  
喧闐醉年少半脫紫茸裘  
秋風放螢苑春草鬪雞臺  
金絡擎鵬去鸞環拾翠來  
蜀船紅錦重越橐水沈堆  
處處皆華表淮王奈却迴

題揚州禪智寺

雨過一蟬噪飄蕭松桂秋  
青苔滿階砌白鳥故遲留  
暮靄生深樹斜陽下小樓  
誰知竹西路歌吹是揚州

句溪夏日送盧霈秀才歸王屋山將欲赴舉

野店正紛泊繭絲初引絲  
行人碧溪渡繫馬綠楊枝  
冉冉

算跡始去悠悠心所期秋山念君別惆悵桂花時

睦州

州在釣臺邊溪山實可憐有家皆掩映無處不潺湲好  
樹鳴幽鳥晴樓入野煙殘春杜陵客中酒落花前

江上雨寄崔碣

春半平江雨圓文破蜀羅聲眠篷底客寒濕釣來蓑閣  
淡遮山遠空濛著柳多此時懷舊恨相望意如何

襄陽雪夜感懷

往事起獨念飄然自不勝前灘急夜響密雪映寒燈的  
的三年夢迢迢一綫絢明朝楚山上莫上最高層

龍丘途中

漢苑殘花別吳江盛夏來惟看萬樹合不見一枝開  
水色饒湘浦灘聲怯建溪淚流迴月上可得更猿啼

旅宿

旅館無良伴凝情自悄然寒燈思舊事斷雁警愁眠遠  
夢歸侵曉家書到隔年湘江好煙月門繫釣魚船

早行

垂鞭信馬行數里未雞鳴林下帶殘夢葉飛時忽驚霜  
凝孤雁迴月曉遠山橫僮僕休辭險何時世路平

李給事

晚髮悶還梳憶君秋醉餘可憐劉校尉曾訟石中書消  
長雖殊事仁賢每見如因看魯褒論何處是吾廬

自貽

杜陵蕭次君遷少去官頻寂寞憐吾道依稀似古人飾

心無彩績剝骨是風塵自嫌如匹素刀尺不由身

閨情

娟娟却月睂新鬢學鴉飛闌砌勻檀粉晴窗畫夾衣袖  
紅垂寂寞睂黛斂依稀還向長陵去今宵歸不歸

題劉秀才新竹

數莖幽玉色曉夕翠煙分搖破寒窗夢穿斜綠蘚紋漸  
籠當檻日惟礙入簾雲不是山陰客何人愛此君

宣州送裴坦判官往舒州時牧欲赴官歸京

日暖泥融雪半銷行人芳草馬聲驕九華山路雲遮寺  
清弋江村柳拂橋君意如鴻高的的我心懸旆正搖搖  
同來不得同歸去故國逢春一寂寥

九日齊安登高

江涵秋影雁初飛與客携壺上翠微塵世難逢開口笑  
菊花須插滿頭歸但將酩酊酬佳節不用登臨恨落暉  
古往今來只如此牛山何必獨霑衣

早雁

金河秋半虜絃開雲外驚飛四散哀仙掌月明孤影過  
長門燈闇數聲來須知邊騎紛紛在豈逐春風一一回  
莫厭瀟湘少人處水多菰米岸莓苔

寄題甘露寺北軒

曾向蓬萊宮裏行北軒欄檻最留情孤高堪弄桓伊笛  
縹緲宜聞子晉笙天接海門秋水色煙籠隋苑暮鐘聲  
他年會著荷衣去不向山僧道姓名

殘春獨來南亭因寄張祐



暖雲如粉草如茵獨步長堤不見人一嶺桃花紅錦點  
半溪山水碧羅新高枝百舌猶欺鳥帶葉梨花獨送春  
仲蔚欲知何處在苦吟林下拂詩塵

長安雜題長句

洪河清渭天池濬太白終南地軸橫祥雲輝映漢宮紫  
春光繡畫秦川明草妬佳人鈿朶色風迴公子玉銜聲  
六飛南幸芙蓉苑十里飄香入夾城

又

豐貂長組金張輩  
駟馬文衣許史家  
白鹿原頭迴獵騎  
紫雲樓下醉江花  
九重樹影連清漢  
萬壽山光學翠華  
誰識大君謙讓德  
世間名利等塵沙

街西長句

碧池新漲浴嬌鴉  
分鏐長安富貴家  
遊騎偶同人鬪酒  
名園相倚杏交花  
銀鞦駉褭嘶宛馬  
繡鞅璵璠走鈿車  
一曲將軍何處笛  
連雲芳樹日初斜

題桐葉

去年桐落故溪上把葉因題歸燕詩江樓今日送歸燕  
正是去年題葉時葉落燕歸真可惜東流玄髮且無期  
笑筵歌席反惆悵明月清風憶別離

洛陽長句二首

草色人心相與閒是非名利有無間橋橫落照虹堪畫  
樹鎖千門鳥自還芝蓋不來雲杳杳仙舟何處水潺潺  
君王諫讓泥金事蒼翠空高萬歲山

天漢東穿白玉京日華浮動翠光生橋邊遊女珮環委

波底上陽金碧明月鑠名園孤鶴唳川酣秋夢鑿龍聲  
連昌繡嶺行宮在玉輦何時父老迎

潤州

句吳亭東千里秋放歌曾作昔年遊青苔寺裏無馬迹  
綠水橋邊多酒樓大抵南朝皆曠達可憐東晉最風流  
月明更想桓伊在一笛聞吹出塞愁

閨情代作

梧桐葉落雁初歸迢遞無因寄遠衣月照石泉金點冷

鳳酣簫管玉聲微佳人刀杵秋風外蕩子從征夢寐稀  
遙望戍樓天欲曉滿城鼙鼓白雲飛

郡齋秋夜即事寄斛斯處士許秀才

有客誰人肯夜過獨憐風景奈愁何邊鴻怨處迷霜久  
庭樹空來見月多故國杳無千里信綵絃時伴一聲歌  
歸心祇待城烏曉幾對虛簷望白河

朱坡

下杜鄉園古泉聲繞舍啼靜思長慘切薄宦與乖睽北

闕千門外南山午谷西倚川紅葉嶺連寺綠楊堤迴野  
翹霜鶴澄潭舞錦雞濤驚堆萬岫舸急轉千溪睂點萱  
牙嫩風條柳幄迷岸藤捎虺尾沙渚印麇蹄火燎湘桃  
塢波光碧繡畦日痕綰翠巘陂影墮晴霓蝸壁爛斑蘚  
銀筵豈菴泥洞雲生片段苔逕繚高低偃蹇松公老森  
嚴竹陣齊小蓮娃欲語幽笋稚相携漢館留餘址周臺  
接故蹊蟠蛟崗隱隱班雉草萋萋樹老蘿紆組巖深石  
啓閨侵窗紫桂茂拂面翠禽棲有計冠終挂無才筆謾

提自塵何太甚休笑觸藩羝

題吳興消暑樓十二韻

晴日登攀好危樓物象饒一溪通四境萬岫遶層霄  
鳥翼舒華屋魚鱗棹短橈浪花機乍織雲葉匠新雕  
臺榭羅嘉卉城池敞麗譙蟾蜍來作鑑蟬螭引成橋  
燕任隨秋葉人空集早潮楚鴻行盡直沙鷺立偏翹  
暮角淒遊旅清歌慘次寥景牽遊目困愁託酒腸銷遠  
吹流松韻殘陽渡柳橋時陪庾公賞還悟脫煩囂

過田家宅

安邑南門外誰家板築高奉誠園裏地牆缺見蓬蒿

鸚鵡

華堂日漸高雕檻繫紅絛故國隴山樹美人金剪刀

歸家

穉子牽衣問歸來何太遲共誰爭歲月贏得鬢邊絲

江樓

獨酌芳春酒登樓已半醺誰驚一行雁衝斷過江雲



獨柳

含煙一株柳拂地搖風久佳人  
不忍折悵望迴纖手

過勤政樓

千秋佳節名空在承露絲囊世已無  
惟有紫苔偏稱意  
年年因雨上金鋪

過華清宮絕句

長安回望繡成堆山頂千門次第開  
一騎紅塵妃子笑  
無人知是荔枝來

登樂遊原

長空澹澹孤鳥沒萬古銷沈向此中看取漢家何事業  
五陵無樹起秋風

甲沈下賢

斯人清唱何人和草徑苔蕪不可尋一夕小敷山下夢  
水如環珮月如襟

朱坡絕句

煙深苔巷唱樵兒花落寒輕倦客歸藤岸竹洲相掩映

滿池春雨鷓鴣飛

將赴吳興登樂遊原一絕

清時有味是無能  
閒愛孤雲靜愛僧  
欲把一麾江海去  
樂遊原上望昭陵

江南春絕句

千里鶯啼綠映紅  
水村山郭酒旗風  
南朝四百八十寺  
多少樓臺煙雨中

齊安郡後池絕句

菱透浮萍綠錦池  
夏鶯千轉弄薔薇  
盡日無人看微雨  
鴛鴦相對浴紅衣

題池州貴池亭

勢比凌歊宋武臺  
分明百里速帆開  
蜀江雪浪西江滿  
強半春寒去却來

蘭溪 在新州

蘭溪春盡碧泱泱  
映水蘭花雨發香  
楚國大夫憔悴日  
應尋此路去瀟湘

山石榴

似火山榴映小山，繁中能薄艷。  
中間一朵佳人玉釵上，  
祇疑燒却翠雲鬟。

入茶山下題水口草市絕句

倚溪侵嶺多高樹，誇酒書旗有小樓。  
驚起鴛鴦豈無恨，一雙飛去却回頭。

柳絕句

數樹新開翠影齊，  
倚風情態被春迷。  
依依故國樊川恨，

半掩村橋半掩溪

題禪院

觥船一棹百分空  
十歲青春不負公  
今日鬢絲禪榻畔  
茶煙輕颺落花風

見吳秀才與池妓別因成絕句

紅燭短時羌笛怨  
清歌咽處蜀絃高  
萬里分飛兩行淚  
滿江寒雨正蕭騷

贈朱道靈

劉根丹篆三千字郭璞青囊兩卷書牛渚磯南謝山北  
白雲深處有巖居

新定途中

無端偶效張文紀下杜鄉園別五秋重過江南更千里  
萬山深處一孤舟

漢江

溶溶漾漾白鷗飛綠淨春深好染衣南去北來人自老  
夕陽長送釣船歸

重到襄陽哭亡友韋壽朋

故人墳樹立秋風  
伯道無兒迹更空  
重到笙歌分散地  
隔江吹笛月明中

泊秦淮

煙籠寒水月籠沙  
夜泊秦淮近酒家  
商女不知亡國恨  
隔江猶唱後庭花

秋浦途中

蕭蕭山路窮  
秋雨淅淅溪風一岸蒲  
為問寒沙新到雁



來時還下杜陵無

寄楊州韓綽判官

青山隱隱水遙遙  
秋盡江南草木凋  
二十四橋明月夜  
玉人何處教吹簫

鄭瓘協律

廣文遺韻留樗散  
難犬圖書共一船  
自說江湖不歸事  
阻風中酒過年年

江上偶見絕句

楚江寒食橘花時  
野渡臨風駐綵旗  
草色連雲人去住  
水紋如縠燕差池

題木蘭廟

彎弓征戰作男兒  
夢裏曾經與畫眉  
幾度思歸還把酒  
拂雲堆上祝明妃

送隱者一絕

無媒逕路草蕭蕭  
自古雲林隔市朝  
公道世間惟白髮  
貴人頭上不曾饒

贈別

娉娉裊裊十三餘  
苴菴梢頭二月初  
春風十里揚州路  
卷上珠簾總不如

寄遠

前山極遠碧雲合  
清夜一聲白雪微  
欲寄相思千里月  
溪邊殘照雨霏霏

斑竹筒簟

血染斑斑成錦紋  
昔年遺恨至今存  
分明知是湘妃泣

何忍將身卧淚痕

倡樓戲贈

細柳橋邊深半春  
纈衣簾裏動香塵  
無端有寄閒消息  
背插金釵笑向人

雨

連雲接塞添迢遞  
灑幕侵燈送寂寥  
一夜不眠孤客耳  
主人窗外有芭蕉

宮詞

監宮引出暫開門隨例須朝不是恩銀鑰却收金鎖合  
月明花落又黃昏

月

三十六宮秋夜深昭陽歌斷信沉沉惟應獨伴陳皇后  
照見長門望幸心

贈漁父

蘆花深處靜垂綸月夕煙朝幾十春自說孤舟寒水畔  
不曾逢著獨醒人

山行

遠上寒山石逕斜，白雲深處有人家。  
停車坐愛楓林晚，霜葉紅於二月花。

重送王十

執袂還應立馬看，向來離思始知難。  
雁飛不見行塵滅，景下山遙極目寒。

洛陽秋夕

泠泠寒水帶霜風，更在天橋夜景中。  
清禁漏聞煙樹寂。

月輪移在上陽宮

贈獵騎

已落雙雕血尚新  
鳴鞭走馬又翻身  
憑君莫射南來雁  
恐有家書寄遠人

懷吳中馮秀才

長洲苑外草蕭蕭  
却算遊程歲月遙  
惟有別時今不忘  
暮煙秋雨過楓橋

秋夕

銀燭秋光冷畫屏，輕羅小扇撲流螢。  
天階夜色涼如水，坐看牽牛織女星。

送故人歸山

三清洞裏無端別，又拂塵衣欲卧雲。  
看著挂冠迷處所，北山蘿月在移文。

聞角

曉樓煙檻出雲霄，景下林塘已寂寥。  
城角遇秋悲更甚，護霜雲破海天遥。



三川驛伏覽座主舍人留題

舊跡依然已十秋  
雪山當面照銀鉤  
懷恩淚盡霜天曉  
一片餘霞映驛樓

長安雪後

秦陵漢苑參差雪  
北闕南山次第春  
車馬滿城原上去  
豈知惆悵有閒人

長安晴望

翠屏山對鳳城開  
碧落搖光霽後來  
迴識六龍巡幸處

飛煙閒繞望春臺

有感

宛溪垂柳最長枝  
曾被春風盡日吹  
不堪攀折猶堪看  
陌上少年來自遲

江南送左師

江南為客正悲秋  
更送吾師古渡頭  
惆悵不同塵土別  
水雲蹤跡去悠悠

汴人舟行答張祐

千萬長河共使船聽君詩句倍悽然春風野岸名花發  
一道帆檣畫柳煙

寓言

暖風遲日柳初含顧影看身又自慙何事明朝獨惆悵  
杏花時節在江南

大夢上人自廬峯迴

行脚尋常到寺稀一枝藜杖一禪衣開門滿院空秋色  
新向廬峯過夏歸

邊上聞笳

何處吹笳薄暮天寒垣高鳥沒狼煙遊人一聽頭堪白  
蘇武爭禁十九年

金谷園

繁華事散逐香塵流水無情草自春日暮東風怨啼鳥  
落花猶似墮樓人

遊邊

黃沙連海路無塵邊草長枯不見春日暮拂雲堆下過

馬前逢著射鵰人

隋堤柳

夾岸垂楊三百里祇應圖畫最相宜  
自嫌流落西歸迅不見東風二月時

子規

蜀地曾聞子規鳥宣城又見杜鵑花  
一叫一回腸一斷三春三月憶三巴

題齊安城樓

鳴軋江樓角一聲微陽潏潏落寒汀不用憑欄苦回首  
故鄉七十五長亭

遊池州林泉寺金碧洞

袖拂霜林下石稜潺湲聲斷滿溪水携茶臘月遊金碧  
合有文章病茂陵

屏風絕句

屏風周昉畫纖腰歲久丹青色半銷斜倚玉窗驚髮女  
拂塵猶自妬嬌嬈

南陵道中

南陵水面漫悠悠，風緊雲輕欲變秋。  
正是客心孤迥處，誰家紅袖凭江樓。

偶作

才子風流詠曉霞，倚樓吟住日初斜。  
驚殺東隣繡牀女，錯將黃暈壓檀花。

遣懷

落魄江南載酒行，楚腰腸斷掌中輕。  
十年一覺揚州夢，

贏得青樓薄倖名

春日途中

田園不事來遊宦故國誰教爾別離  
獨倚闌亭還把酒  
一年春盡送春時

歎花

自恨尋芳到已遲往年曾見未開時  
如今風擺花狼藉  
綠葉成陰子滿枝


瑤瑟



玉仙瑤瑟夜珊珊月過樓西桂燭殘風景人間不如此  
動搖湘水徹明寒

華清宮

零葉飜紅萬樹霜玉蓮開藥暖泉香行雲不下朝元閣  
一曲淋鈴淚數行



石倉歷代詩選卷七十五